




**PARLAMENTARNA SKUPŠTINA BiH  
ZASTUPNIČKI DOM**  
n/r Predsjedavajuće Borjane Krišto

Sarajevo, 15. 03. 2021.



Na temelju člana 104. stava (1), 105. i 106. Stava (1) Poslovnika Zastupničkog doma Parlamentarne skupštine BiH („Službeni glasnik BiH“, br. 79/14, 81/15, 97/15), kao ovlaštenu predlažu, u ime Kluba zastupnika, dostavljam Prijedlog zakona o Uredu disciplinskog tužioca Bosne i Hercegovine radi razmatranja i usvajanja u Parlamentarnoj skupštini BiH.


Također, napominjemo da je ovaj tekst usklađen i sa Mišljenjem Sekretarijata Zajedničke službe i Zakonodavnopravnog sektora, pod brojem: 03/7- 01 - 02 -1 – 2376-2/20 od 10. 03. 2021.

Predlažem razmatranje ovoga Prijedloga po osnovnom zakonodavnom postupku.

U prilogu dostavljam tekst Zakona sa obrazloženjem na bosanskom jeziku.

KLUB ZASTUPNIKA DF

Predsjedavajući Kluba

  
Dženana Đonlagić

**ZAKON**  
**O UREDU DISCIPLINSKOG TUŽIOCA BOSNE I HERCEGOVINE**

Decembar 2020. godine

Na osnovu člana IV 4. a) Ustava Bosne i Hercegovine, Parlamentarna skupština Bosne i Hercegovine, na \_\_\_\_ sjednici Zastupničkog doma održanoj \_\_\_\_\_ i na \_\_\_\_ sjednici Doma naroda, održanoj \_\_\_\_\_, usvojila je

**ZAKON**  
**O UREDU DISCIPLINSKOG TUŽIOCA BOSNE I HERCEGOVINE**

**DIO PRVI – OSNOVNE ODREDBE**

**Član 1.**

**(Predmet zakona)**

Ovim zakonom osniva se Ured disciplinskog tužioca Bosne i Hercegovine i reguliše: njegov rad, organizacija, nadležnosti, ovlaštenja, uslovi i mandat za vršenje funkcije, način izbora i imenovanje članova i druga pitanja u vezi sa radom Ureda disciplinskog tužioca Bosne i Hercegovine.

**Član 2.**

**(Samostalnost)**

- (1) Ured disciplinskog tužioca Bosne i Hercegovine je nezavisan i samostalan organ Bosne i Hercegovine koji vrši dužnost tužioca u vezi sa navodima koji se tiču povreda dužnosti sudije, tužioca ili člana Visokog sudskog vijeća i Visokog tužilačkog vijeća, u skladu sa ovim zakonom i Poslovníkom o radu i ima svojstvo pravnog lica.
- (2) U okviru svoje nadležnosti Ured disciplinskog tužioca Bosne i Hercegovine ostvaruje saradnju sa Visokim tužilačkim vijećem, Visokim sudskim vijećem, državnim, entitetskim i drugim organima i organizacijama.
- (3) Ured disciplinskog tužioca Bosne i Hercegovine ima pečat, koji sadrži njegov naziv, te naziv i grb Bosne i Hercegovine u skladu sa Zakonom o pečatu institucija Bosne i Hercegovine ("Službeni glasnik BiH", br. 12/98, 14/03 i 62/11).
- (4) Na Ured disciplinskog tužioca Bosne i Hercegovine se ne primjenjuju odredbe Zakona o ministarstvima i drugim organima uprave Bosne i Hercegovine ("Službeni glasnik BiH", br. 5/03, 42/03, 26/04, 42/04, 45/06, 88/07, 35/09, 59/09, 103/09, 87/12, 6/13, 19/16 i 83/17) i Zakona o upravi ("Službeni glasnik BiH", broj 32/02, 102/09 i 72/17).

**Član 3.**

**(Članovi Ureda disciplinskog tužioca Bosne i Hercegovine)**

- (1) Funkciju Ureda disciplinskog tužioca Bosne i Hercegovine vrši glavni disciplinski tužioc i zamjenici glavnog disciplinskog tužioca, te disciplinski tužioc.
- (2) Broj zamjenika glavnog disciplinskog tužioca i broj disciplinskih tužioca određuje Visoko tužilačko vijeće Bosne i Hercegovine.
- (3) Glavni disciplinski tužioc, zamjenike glavnog disciplinskog tužioca i disciplinske tužioce bira i imenuje Zastupnički dom Parlamentarne skupštine Bosne i Hercegovine.

- (4) Na disciplinsku odgovornost i razrješenje glavnog disciplinskog tužioca, zamjenika glavnog disciplinskog tužioca i disciplinskog tužioca primjenjuju se iste odredbe koje važe za disciplinsku odgovornost i razrješenje glavnog tužioca, zamjenika glavnog tužioca i tužioca u Bosni Hercegovini, s tim što odluku donosi Zastupnički dom Parlamentarne skupštine Bosne i Hercegovine, nakon procedure koju provodi nadležna Prvostepena „ad hoc“ komisija Doma, na čiju odluku stranka ima pravo žalbe Drugostepenoj „ad hoc“ komisiji Doma.
- (5) Kako bi se postigla ravnopravna zastupljenost naroda, glavni disciplinski tužioc i zamjenici glavnog disciplinskog tužioca ne mogu biti pripadnici istog konstitutivnog naroda. Najmanje jedan od njih će biti iz reda ostalih.
- (6) Članovi Ureda disciplinskog tužioca Bosne i Hercegovine moraju biti lica visokih moralnih i profesionalnih kvaliteta.
- (7) U obavljanju svojih dužnosti članovi Ureda disciplinskog tužioca Bosne i Hercegovine postupaju nezavisno i nepristrasno.

#### **Član 4.**

##### **(Javnost rada)**

Rad Ureda disciplinskog tužioca Bosne i Hercegovine je javan, ukoliko ovim zakonom nije drukčije propisano.

#### **Član 5.**

##### **(Sredstva za rad)**

- (1) Ured disciplinskog tužioca Bosne i Hercegovine se finansira iz Budžeta institucija Bosne i Hercegovine i međunarodnih obaveza Bosne i Hercegovine.
- (2) Ured disciplinskog tužioca Bosne i Hercegovine samostalno raspolaže sredstvima iz stava (1) ovog člana.

#### **Član 6.**

##### **(Sjedište)**

Sjedište Ureda disciplinskog tužioca je u Sarajevu.

#### **Član 7.**

##### **(Upotreba izraza u muškom ili ženskom rodu)**

Riječi koje su radi preglednosti u ovom zakonu navedene u jednom rodu bez diskriminacije odnose se i na muški i na ženski rod.

## **DIO DRUGI - SASTAV, ODLUČIVANJE, NAČIN IZBORA, ODGOVORNOST I PRESTANAK MANDATA**

### **POGLAVLJE I. URED DISCIPLINSKOG TUŽIOCA**

#### **Član 8. (Disciplinski tužioc)**

- (1) Ured disciplinskog tužioca Bosne i Hercegovine, vrši dužnost tužioca u vezi sa navodima koji se tiču povreda dužnosti sudije, tužioca ili člana Visokog sudskog vijeća i Visokog tužilačkog vijeća, u skladu sa ovim zakonom, poslovníkom o radu, poslovníkom o radu Visokog sudskog vijeća Bosne i Hercegovine i poslovníkom o radu Visokog tužilačkog vijeća Bosne i Hercegovine.
- (2) Ured disciplinskog tužioca postupa po pritužbama ili na vlastitu inicijativu i odgovoran je za procjenu pravne valjanosti pritužbi, istraživanje navoda protiv sudija, tužioca ili članova Visokog sudskog vijeća i Visokog tužilačkog vijeća o povredi dužnosti, te za pokretanje disciplinskog postupka i zastupanje predmeta disciplinskih prekršaja pred disciplinskim komisijama Visokog sudskog vijeća i Visokog tužilačkog vijeća.
- (3) Za glavnog disciplinskog tužioca Ureda disciplinskog tužioca, Zastupnički dom Parlamentarne skupštine Bosne i Hercegovine, nakon provedenog javnog konkursa, imenuje osobu koja je sudija ili tužioc, ili koja ispunjava minimum uslova predviđenih Zakonom o Visokom sudskom vijeću ili Zakonom o Visokom tužilačkom vijeću za imenovanje sudije ili tužioca, osobu visokih moralnih kvaliteta koja posjeduje potrebnu stručnost na polju prava. Mandat glavnog disciplinskog tužioca traje četiri godine, uz mogućnost ponovnog imenovanja. Pomoć u radu disciplinskog tužioca pružat će pravnici i istražitelji iz njegovog ureda. Glavni disciplinski tužioc može ovlastiti pravnike iz svog ureda da zastupaju predmete pred Visokim sudskim vijećem i Visokim tužilačkim vijećem i njihovim disciplinskim komisijama.
- (4) U slučaju sukoba interesa ili u slučajevima u kojima bi se glavni tužioc morao izuzeti iz istrage ili postupanja u disciplinskoj stvari pred Visokim sudskim vijećem i Visokim tužilačkim vijećem ili njihovim disciplinskim komisijama, Ured disciplinskog tužioca angažuje pravnika izvan Ureda disciplinskog tužioca da obavi istragu i postupa u disciplinskoj stvari.
- (5) Glavni tužioc Ureda disciplinskog tužioca imenuje se i smjenjuje odlukom Zastupničkog doma Parlamentarne skupštine Bosne i Hercegovine, u skladu sa Zakonom o državnoj službi u institucijama Bosne i Hercegovine. („Službeni glasnik BiH“, br. 12/02, 19/02, 8/03, 35/03, 4/04, 17/04, 26/04, 37/04, 48/05, 2/06, 32/07, 43/09, 8/10, 40/12 i 93/17).
- (6) Plata glavnog disciplinskog tužioca Ureda disciplinskog tužioca jednaka je prosječnoj plati tužioca kantonalnog tužilaštva u Federaciji Bosne i Hercegovine i okružnog tužilaštva u Republici Srpskoj.
- (7) Glavni disciplinski tužioc donosi sve administrativne i finansijske odluke Ureda disciplinskog tužioca, a izvršava ih Sekretarijat po nalogu glavnog disciplinskog tužioca.

#### **Član 9.**

##### **(Nova imenovanja)**

- (1) Ured disciplinskog tužioca obavještava organ koji je nadležan za izbor ili imenovanje disciplinskog tužioca, najmanje tri mjeseca prije isteka mandata pojedinog disciplinskog tužioca i traži od toga organa da izabere ili imenuje novog.
- (2) U slučaju da mandat disciplinskog tužioca ne prestaje zbog isteka mandata nego iz drugih razloga i da je potrebno izabrati ili imenovati novog, Ured disciplinskog tužioca obavještava organ nadležan za izbor ili imenovanje novog disciplinskog tužioca, najkasnije u roku od deset dana nakon prestanka mandata.

#### **Član 10.**

##### **(Vođenje evidencije i izvještavanje nadležnog Vijeća)**

- (1) Ured disciplinskog tužioca vodi evidenciju o uložnim pritužbama i o poduzetim radnjama u postupanju po pritužbama, istragama i disciplinskim predmetima.
- (2) Visoko sudsko vijeće i Visoko tužilačko vijeće imaju pristup evidenciji. Ured disciplinskog tužioca je obavezan da stvarno nadležnom Vijeću na zahtjev dostavi kopije pritužbi, izvještaja o istrazi ili drugih relevantnih dokumenata.
- (3) Ured disciplinskog tužioca periodično u pismenoj formi izvještava Visoko sudsko vijeće i Visoko tužilačko vijeće o svojim aktivnostima.

### **POGLAVLJE II. ADMINISTRACIJA UREDA**

#### **Član 11.**

##### **(Sekretarijat Ureda)**

- (1) Stručne, finansijske i administrativne poslove Ureda disciplinskog tužioca Bosne i Hercegovine obavlja Sekretarijat Ureda, pod nadzorom glavnog disciplinskog tužioca. U poslove Sekretarijata Ureda spada, između ostalog, pružanje administrativne podrške, obavljanje pravnog, finansijskog i drugog istraživanja neophodnog kako bi Ured disciplinskog tužioca Bosne i Hercegovine ostvarivao svoj mandat u skladu sa zakonom, kao i davanje strateških savjeta o pitanjima vezanim za izvršavanje mandata Ureda disciplinskog tužitelja Bosne i Hercegovine. Sekretarijat Ureda je nadležan i za izradu prijedloga godišnjeg budžeta i godišnjeg izvještaja Ureda disciplinskog tužitelja Bosne i Hercegovine iz člana 12. ovog Zakona.
- (2) Sekretarijat ima direktora i zamjenika direktora, koji su odgovorni glavnom disciplinskom tužiocu. Direktora i zamjenika direktora imenuje i razrješava glavni disciplinski tužioc u skladu sa odredbama Zakona o državnoj službi u institucijama Bosne i Hercegovine. Mandat direktora i mandat zamjenika direktora ograničen je na period od četiri godine. Izuzetno od odredaba iz druge rečenice stava (2) člana 34. Zakona o državnoj službi u institucijama Bosne i Hercegovine, mandat direktora i zamjenika direktora može se produžavati svake četiri godine.
- (3) Sekretarijat ima uposlenike koji mu omogućavaju efikasno obavljanje zadataka u skladu sa zakonom. Državne službenike u Sekretarijatu imenuje i razrješava komisija u skladu sa odredbama Zakona o državnoj službi u institucijama Bosne i Hercegovine. Uposlenike

Sekretarijata koji nemaju status državnih službenika imenuje i razrješava komisija u čijem sastavu je član kojeg glavni disciplinski tužioc izabere, direktor i zamjenik direktora u skladu sa zakonima Bosne i Hercegovine iz oblasti radnih odnosa.

- (4) Član 19. stav (2) Zakona o državnoj službi u institucijama Bosne i Hercegovine ne primjenjuje se na popunjavanje upražnjenih mjesta u Sekretarijatu. Sva imenovanja u Sekretarijat regulišu se članom 28. stav (2) Zakona o državnoj službi u institucijama Bosne i Hercegovine, dok član 51. stav (2) tog zakona reguliše razrješavanje uposlenika Sekretarijata. Direktor ili osoba koju on ovlasti i osobu koju glavni disciplinski tužioc izabere, uvijek su članovi komisije za izbor pomenut u članu 24. stav (2) Zakona o državnoj službi u institucijama Bosne i Hercegovine. Na prijedlog direktora, glavni disciplinski tužioc odlučuje o prirodí i sadržaju javnog konkursa koji se provodi u skladu sa članom 26. stav (1) Zakona o državnoj službi u institucijama Bosne i Hercegovine.
- (5) Direktor je odgovoran za sveukupno obavljanje stručnih, finansijskih i administrativnih poslova Sekretarijata, za izvršenje budžeta, kao i za ostale poslove o kojima odluči glavni disciplinski tužioc.
- (6) Zamjenik direktora je odgovoran za nadzor nad izvršenjem odluka Ureda disciplinskog tužioca, kao i za ostale poslove o kojima odluči glavni disciplinski tužioc. Zamjenik direktora zamjenjuje direktora u njegovom odsustvu.
- (7) Ured disciplinskog tužioca, u dogovoru s Vijećem ministara Bosne i Hercegovine, odlučuje o platama uposlenika Sekretarijata koji nisu navedeni u Zakonu o platama i drugim naknadama u sudskim i tužilačkim institucijama na nivou Bosne i Hercegovine. („Službeni glasnik BiH“, br 93/05, 25/04).
- (8) Ured disciplinskog tužioca može primati sredstva od međunarodnih donatora za operativni budžet Ureda, kao i za posebne projekte reforme pravosuđa izvan operativnog budžeta Ureda. Ta sredstva se uplaćuju na poseban račun otvoren kod Centralne banke Bosne i Hercegovine. Sredstva se troše po nalogu direktora Sekretarijata, u skladu s propisima o izvršenju donatorskih sredstava koje donosi Ured disciplinskog tužioca i u skladu sa uslovima ugovora o donacijama potpisanih sa donatorom.

## **Član 12.**

### **(Godišnji budžet i godišnji izvještaj)**

- (1) Ured disciplinskog tužioca usvaja prijedlog godišnjeg budžeta za svoj rad.
- (2) Ured disciplinskog tužioca dostavlja svoj prijedlog godišnjeg budžeta Ministarstvu pravde Bosne i Hercegovine na vrijeme tako da bi ga taj organ mogao razmotriti. Ured disciplinskog tužioca ima pravo da prijedlog obrazlaže direktno pred Parlamentarnom skupštinom Bosne i Hercegovine. Ured disciplinskog tužioca obavještava entitetska ministarstva pravde o svom prijedlogu budžeta.
- (3) Najkasnije do 01. maja svake godine Ured disciplinskog tužioca priprema godišnji izvještaj u kojem navodi svoje aktivnosti. Izvještaj se dostavlja Parlamentarnoj skupštini Bosne i Hercegovine, Vijeću ministara Bosne i Hercegovine, Parlamentu Federacije Bosne i Hercegovine, skupštinama kantona, Narodnoj skupštini Republike Srpske, državnom i

entitetskim ministarstvima pravde i Skupštini Brčko Distrikta Bosne i Hercegovine u svrhu informiranja. Izvještaj je dostupan javnosti.

- (4) Na poziv Parlamentarne skupštine ili drugog organa iz stava (3) ovog člana, glavni disciplinski tužioc ili drugi ovlašteni predstavnik Ureda disciplinskog tužioca će direktno na sjednici obrazložiti izvještaj i odgovoriti na pitanja poslanika odnosno članova drugog organa. Kroz raspravu o izvještaju i zaključke mogu se dati ocjene, sugestije i prijedlozi koji ne osporavaju samostalnost Ureda disciplinskog tužioca.

#### **Član 13.**

##### **(Poslovnik Ureda disciplinskog tužioca)**

- (1) Ured disciplinskog tužioca donosi poslovnik kojim se uređuju pitanja propisana ovim zakonom i druga pitanja od značaja za organizovanje rada Ureda disciplinskog tužioca.
- (2) Poslovnik Ureda disciplinskog tužioca objavljuje se u "Službenom glasniku BiH".

#### **Član 14.**

##### **(Pravilnik)**

- (1) Ured disciplinskog tužioca usvaja i objavljuje Pravilnik koji uređuje organizaciju, sistematizaciju radnih mjesta, poslovanje, imenovanje, disciplinske postupke i druga pitanja.
- (2) Pravilnik se objavljuje u „Službenom glasniku BiH“.

### **DIO TREĆI - NADLEŽNOST I OVLAŠTENJA**

#### **POGLAVLJE I. POSTUPAK**

#### **Član 15.**

##### **(Ispitivanje navoda)**

- (1) Ured disciplinskog tužioca može pokrenuti ispitivanje navoda o povredi dužnosti ili nesposobnosti sudije ili tužioca da vrši dužnost.
- (2) Svi sudovi, tužilaštva i državni organi, Visoko sudsko vijeće i Visoko tužilačko vijeće, kao i sudije, tužioc, dodatne sudije, sudije porotnici i uposlenici sudova ili tužilaštava dužni su postupati u skladu sa zahtjevima Ureda disciplinskog tužioca u pogledu davanja informacija, dokumenata ili drugog materijala u vezi sa ispitivanjem navoda.
- (3) Ured disciplinskog tužioca može nadležnoj disciplinskoj komisiji podnijeti zahtjev da se osobama ili organima na koje se ne odnosi odredba stava (2) ovog člana izda nalog za davanje informacija, dokumenata ili drugog materijala u vezi s ispitivanjem navoda.
- (4) U slučaju da sudija ili tužioc odbije da dostavi informacije, dokumente ili drugi materijal u skladu sa zahtjevom Ureda disciplinskog tužioca, Ured može zatražiti od nadležne disciplinske komisije da izda nalog kojim će prinuditi tog sudiju ili tužioca da dostavi tražene informacije, dokumente ili drugi materijal.



## **Član 16.**

### **(Obaveza da se postupi u skladu sa upitom i zahtjevima)**

- (1) Sudovi, tužilaštva i državni organi, članovi Visokog sudskog vijeća i Visokog tužilačkog vijeća, kao i sudije, predsjednici sudova, tužioci, glavni tužioci i zamjenici glavnog tužioca, sudije porotnici, dodatne sudije i uposlenici sudova i tužilaštava, dužni su postupiti u skladu sa zahtjevima Ureda disciplinskog tužioca u pogledu davanja informacija, dokumenata i drugog materijala u vezi sa vršenjem nadležnosti Ureda disciplinskog tužioca, te prisustvovati sjednicama u skladu sa zahtjevima Ureda disciplinskog tužioca u vezi sa vršenjem nadležnosti Ureda.
- (2) U mjeri potrebnoj za vršenje nadležnosti prema ovom ili bilo kojem drugom zakonu, Ured disciplinskog tužioca i njegovi predstavnici imaju pristup svim prostorijama i dokumentaciji sudova i tužilaštava u Bosni i Hercegovini, kao i Visokog sudskog vijeća i Visokog tužilačkog vijeća Bosne i Hercegovine.

## **Član 17.**

### **(Pokretanje disciplinskog postupka i podnošenje tužbe)**

- (1) Ured disciplinskog tužioca pokreće disciplinski postupak pred nadležnom Prvostepenom disciplinskom komisijom podnošenjem tužbe, ako smatra da je sudija, tužioc ili član Visokog sudskog vijeća i Visokog tužilačkog vijeća učinio povredu dužnosti.
- (2) Tužba sadrži navodne disciplinske prekršaje i mora ispunjavati uslove predviđene Poslovníkom koji uređuje disciplinski postupak.

## **Član 18.**

### **(Prava stranaka tokom disciplinskog postupka)**

Disciplinski postupak se vodi na pravičan i transparentan način. U toku trajanja disciplinskog postupka, sudija, tužioc ili član Visokog sudskog vijeća i Visokog tužilačkog vijeća, protiv kojeg se vodi postupak ima sljedeća prava koja moraju biti garantovana Poslovníkom o disciplinskom postupku, a koja donosi Visoko sudsko vijeće i Visoko tužilačko vijeće:

- a) Pravo da na propisan način bude upoznat sa navodima o disciplinskom prekršaju i dokazima koji ukazuju na te navode, kao i pravo da odgovor da u pismenoj formi ili usmeno na zapisnik;
- b) Pravo na pravičnu i javnu raspravu u razumnom roku pred nezavisnom i nepristrasnom, zakonom ustanovljenom komisijom. Mediji i javnost mogu biti isključeni tokom cijele rasprave ili tokom dijela rasprave u interesu morala, javnog reda ili nacionalne sigurnosti u demokratskom društvu, kada to zahtijevaju interesi maloljetnika ili zaštita privatnog života stranaka ili kada je po mišljenju komisije to potrebno u posebnim okolnostima gdje bi prisustvovanje javnosti bilo na štetu interesa pravde;
- c) Pravo da ne daje odgovor na pitanja koja bi ga mogla izložiti krivičnom gonjenju i pravo da prisustvuje na svakoj raspravi, te da se brani od optužbi uz pomoć branioca po svom izboru;
- d) Pravo da odluke budu javno objavljene i na taj način dostupne javnosti; i

- e) Pravo da izjavi žalbu na po njega negativnu odluku.

#### **Član 19.**

##### **(Sporazum o zajedničkoj saglasnosti)**

- (1) Ured disciplinskog tužioca i osoba protiv koje je podnesena tužba kao i njegov pravni zastupnik mogu se, ako je to moguće, bilo kada dobrovoljno nagoditi o navodnim disciplinskim prekršajima za koje je sudija ili tužioc optužen. Stranke se mogu složiti koje će disciplinske prekršaje sudija ili tužioc priznati i koja će se disciplinska mjera izreći. Stranke podnose Sporazum o zajedničkoj saglasnosti o utvrđivanju disciplinske odgovornosti (u daljem tekstu: Sporazum) koji sadrži disciplinske prekršaje koje sudija ili tužioc priznaje.
- (2) Sporazum se sastavlja u pismenoj formi, i nakon što je potpisan od stranaka, dostavlja se nadležnom Vijeću. Sporazum sadržava:
  - a) Izjavu o činjenicama na okolnosti vezane za prekršaje koje sudija ili tužioc priznaje;
  - b) Zajedničku izjavu o mjeri, ukoliko će se ona izreći.
- (3) Sporazum se dostavlja predsjedniku nadležnog Vijeća, koji imenuje disciplinsku komisiju za razmatranje Sporazuma. Komisija prihvata ili odbija Sporazum većinom glasova. Ako odluči da odbije Sporazum, Komisija će obrazložiti razloge tog odbijanja u pismenoj formi.
- (4) Ako Komisija prihvati Sporazum, postupat će se kao da je Komisija nakon vođenja disciplinskog postupka utvrdila da je učinjen disciplinski prekršaj, s tim da nakon što Komisija prihvati Sporazum nema prava žalbe.
- (5) Ukoliko Komisija odbije Sporazum, činjenica da su stranke pokušale pregovaranjem doći do sporazuma o disciplinskom prekršaju, kao i bilo koje priznanje učinjeno od stranke pred Komisijom tokom rasprave o postizanju Sporazuma, ne može se upotrijebiti od bilo koje stranke u ponovnom disciplinskom postupku ili protiv nje.
- (6) U slučaju da Komisija odbije Sporazum, Ured disciplinskog tužioca može pokrenuti disciplinski postupak protiv sudije ili tužioca koji su navedeni u Sporazumu u roku od 90 dana od datuma odbijanja Sporazuma.
- (7) Svi sporazumi o zajedničkoj saglasnosti sadrže izjavu, koju potpisuje sudija ili tužioc o kojem se radi, da mu je poznato da Sporazum o zajedničkoj saglasnosti treba odobriti nadležna Prvostepena disciplinska komisija i da Komisija, prema vlastitoj ocjeni, može odbiti takav sporazum.

#### **Član 20.**

##### **(Zastarijevanje pokretanja disciplinskog postupka)**

- (1) Disciplinski postupak se ne može pokrenuti protiv sudije, tužioca ili člana Visokog sudskog vijeća i Visokog tužilačkog vijeća po isteku više od pet godina od dana na koji je navodni prekršaj učinjen, ili u slučaju krivične stvari, po isteku više od dvije godine od dana kada je sud donio konačnu i obavezujuću odluku u krivičnom postupku.

- (2) Zastarijevanje iz stava (1) ovog člana se ne primjenjuje na navodne prekršaje koji se odnose na namjerno davanje lažne, obmanjive ili nedovoljne informacije u vezi s prijavama za radno mjesto, disciplinskim stvarima, pitanjima unapređenja i napredovanja u službi ili bilo kojim drugim pitanjima koja su u nadležnosti Visokog sudskog vijeća i Visokog tužilačkog vijeća.
- (3) Ured disciplinskog tužioca ne može pokrenuti disciplinski postupak protiv sudije, tužioca ili člana Visokog sudskog vijeća i Visokog tužilačkog vijeća, po isteku više od dvije godine od dana kada je zaprimio prvu pritužbu ili informaciju o navodnom prekršaju.

#### **Član 21.**

##### **(Zastarijevanje vođenja disciplinskog postupka)**

Postupak za utvrđivanje disciplinske odgovornosti mora se okončati u roku od godinu dana od dana podnošenja zvanične tužbe disciplinskoj komisiji, osim ukoliko se utvrdi razlog koji produženje ovog roka čini opravdanim.

## **POGLAVLJE II. POVJERLJIVOST**

#### **Član 22.**

##### **(Povjerljivost)**

- (1) Svi postupci ili radnje koje se odnose na navode o povredi dužnosti ili nesposobnosti za vršenje dužnosti, a koje su poduzete prije nego što Ured disciplinskog tužioca podnese zvaničnu tužbu, povjerljive su prirode, osim ako se sudija, tužioc ili član Visokog sudskog vijeća i Visokog tužilačkog vijeća na kojeg se navodi odnose u pismenoj formi ne odrekne prava na povjerljivost.
- (2) Ukoliko javnost prije podnošenja zvanične tužbe sazna za istragu o mogućoj povredi dužnosti ili nesposobnosti za vršenje dužnosti, Ured disciplinskog tužioca može dati izjavu kako bi potvrdio da je istraga u toku, pojasnio procesne aspekte disciplinskog postupka, objasnio prava sudija i tužioca na pravičnu raspravu uz poštivanje pretpostavke nevinosti, ili naveo kako sudija ili tužioc negira navode, ili ispravio pogrešne informacije kojim javnost raspolaže.

#### **Član 23.**

##### **(Tajnost i imunitet)**

- (1) Pritužba ili dopis koji zaprimi Ured disciplinskog tužioca u kojem se navode povrede dužnosti od strane sudija, tužioca ili članova Visokog sudskog vijeća i Visokog tužilačkog vijeća, kao i informacije prikupljene tokom istrage predstavljaju tajnu, izuzev za Visoko sudsko vijeće i Visoko tužilačko vijeće, po njihovom zahtjevu i po stvarnoj nadležnosti.
- (2) Glavni disciplinski tužioc, zamjenik glavnog disciplinskog tužioca i disciplinski tužioc, kao ni osoblje Ureda disciplinskog tužioca i međunarodni stručnjaci koji su potpisali ugovor s Uredom ili su ustupljeni od strane stranih vlada neće biti odgovorni u građanskom postupku za bilo koju radnju učinjenu tokom vršenja svojih službenih dužnosti.

- (3) Glavni disciplinski tužioc, zamjenik glavnog disciplinskog tužioca i disciplinski tužioc ne može biti krivično gonjen, uhapšen ili zadržan u pritvoru za mišljenja koja daje ili za odluke koje donese u okviru svojih službenih dužnosti.
- (4) Posjedovanje imuniteta neće spriječiti ili odgoditi istragu u krivičnom ili građanskom postupku koja se o nekoj stvari u skladu sa zakonom vodi protiv glavnog disciplinskog tužioca, zamjenika glavnog disciplinskog tužioca i disciplinskog tužioca.

#### **Član 24.**

##### **(Nespojivost funkcije)**

- (1) Glavni disciplinski tužioc, zamjenik glavnog disciplinskog tužioca i disciplinski tužioc, kao ni osoblje Ureda disciplinskog tužioca ne smiju obavljati funkciju niti bilo kakvu dužnost u političkoj partiji, kao ni u udruženjima ili fondacijama povezanim sa političkim partijama. Ove osobe dužne su suzdržati se i od sudjelovanja u aktivnostima političkih partija.
- (2) Glavni disciplinski tužioc, zamjenik glavnog disciplinskog tužioca i disciplinski tužioc ne smije obavljati bilo kakvu dužnost koja je nespojiva s njegovom dužnosti ili dužnost za koju se može smatrati da ometa ispravno i nepristrasno vršenje dužnosti glavnog disciplinskog tužioca, zamjenika glavnog disciplinskog tužioca i disciplinskog tužioca ili koja može imati negativan utjecaj na nezavisnost ili ugled funkcije, dovesti u sumnju njegovu sposobnost da postupa nepristrasno ili štetiti ugledu tužilačke dužnosti.
- (3) Glavni disciplinski tužioc, zamjenik glavnog disciplinskog tužioca i disciplinski tužioc ne smije biti član bilo kakve organizacije koja vrši diskriminaciju na osnovu rase, boje, spola, spolne opredijeljenosti, vjerske pripadnosti ili etničkog porijekla ili nacionalne pripadnosti niti smije ugovoriti korištenje objekata koji pripadaju takvim organizacijama i mora istupiti iz takvih organizacija odmah nakon što sazna za takvo njihovo postupanje.
- (4) Po preuzimanju dužnosti, glavni disciplinski tužioc, zamjenik glavnog disciplinskog tužioca i disciplinski tužioc je dužan potpisati izjavu o nepostojanju sukoba interesa, na način kako je to propisano Pravilnikom Ureda disciplinskog tužioca.

#### **Član 25.**

##### **(Zabrana vršenja javnih dužnosti, dužnosti iz pravne oblasti i drugih dužnosti)**

- (1) Glavni disciplinski tužioc, zamjenik glavnog disciplinskog tužioca i disciplinski tužioc ne smije vršiti bilo kakvu drugu javnu dužnost koja je nespojiva s vršenjem tužilačke dužnosti, osim ako zakonom nije drugačije propisano.
- (2) Glavni disciplinski tužioc, zamjenik glavnog disciplinskog tužioca i disciplinski tužioc ne smije biti advokat, notar niti obavljati druge poslove koji se obavljaju uz naplatu, a koji su nespojivi s vršenjem dužnosti tužioca, osim ako zakonom nije drugačije propisano. Izuzetno, glavni disciplinski tužioc, zamjenici glavnog disciplinskog tužioca i disciplinski tužioc mogu biti uključeni u akademske, nastavne ili slične aktivnosti u svrhu educiranja javnosti i mogu biti za njih nagrađeni.
- (3) Glavni disciplinski tužioc, zamjenik glavnog disciplinskog tužioca i disciplinski tužioc ne smije biti član upravnog ili nadzornog odbora javnih ili privatnih preduzeća, ili drugih pravnih osoba.

- (4) Glavni disciplinski tužioc, zamjenik glavnog disciplinskog tužioca i disciplinski tužioc ne smije obavljati bilo kakve druge dužnosti koje mogu ometati vršenje dužnosti tužioca.

## **DIO ČETVRTI - PRELAZNE I ZAVRŠNE ODREDBE**

### **POGLAVLJE I. PRELAZNE ODREDBE**

#### **Član 26.**

##### **(Preraspodjela osoblja)**

- (1) Visoko sudsko vijeće i Visoko tužilačko vijeće će u saradnji sa Uredom disciplinskog tužioca preuzeti i rasporediti osoblje Sekretarijata Visokog sudskog i tužilačkog vijeća (VSTV).
- (2) Mandat zatečenog glavnog disciplinskog tužitelja, zamjenika i disciplinskih tužitelja traje do isteka.
- (3) Imovina, finansijske obaveze, oprema, materijalna i nematerijalna sredstva, spisi i drugi dokumenti ili vlasništvo dosadašnjeg Ureda disciplinskog tužioca Visokog sudijskog i tužilačkog vijeća iz stava (1) ovog člana, ustupaju se Uredu disciplinskog tužioca Bosne i Hercegovine.
- (4) Međunarodni stručnjaci mogu biti dodijeljeni Uredu disciplinskog tužioca. Privilegije i imuniteti u vezi sa diplomatskim statusom međunarodnih stručnjaka regulišu se sporazumom između Vijeća ministara Bosne i Hercegovine i Ureda disciplinskog tužitelja.
- (5) Međunarodni stručnjaci koji potpišu ugovor sa Uredom disciplinskog tužioca ili su ustupljeni od stranih vlada, a čija se plata i naknade isplaćuju iz sredstava dobivenih od međunarodnih donatora, izuzimaju se od plaćanja poreza na prihod ili bilo kog drugog poreza ili doprinosa na plaću i naknade koji se ubire u skladu sa zakonima Bosne i Hercegovine.

#### **Član 27.**

##### **(Dosadašnji mandati direktora i zamjenika direktora)**

Mandat direktora i zamjenika direktora Sekretarijata predviđen u ovom Zakonu smatra se započetim danom preuzimanja dužnosti direktora odnosno zamjenika direktora.

### **POGLAVLJE II. ZAVRŠNE ODREDBE**

#### **Član 28.**

##### **(Usklađivanje zakona)**

Zakoni ili zakonske odredbe sadržane u zakonima koji su na snazi u Republici Srpskoj, Federaciji Bosne i Hercegovine i Brčko Distriktu Bosne i Hercegovine moraju se uskladiti s ovim zakonom, a one odredbe koje nisu u skladu s ovim zakonom prestaju da važe.

**Član 29.**

**(Postupci u toku)**

Svi postupci koji su započeti po odredbama Zakona o Visokom sudskom i tužilačkom vijeću Bosne i Hercegovine ("Službeni glasnik BiH" br. 25/04, 93/05, 48/07 i 15/08) nastaviti će se po odredbama tog zakona.

**Član 30.**

**(Rok za donošenje podzakonskih akata)**

Podzakonski akti za sprovođenje ovog zakona donijet će se najkasnije u roku od tri mjeseca od dana početka primjene ovog zakona.

**Član 31.**

**(Stupanje na snagu)**

Ovaj zakon stupa na snagu osmog dana od dana objavljivanja u „Službenom glasniku BiH“ a početak će se primjenjivati nakon šest mjeseci od dana njegovog stupanja na snagu.

## OBRASLOŽENJE

### I - USTAVNI OSNOV ZA USVAJANJE ZAKONA

Ustavni osnov za usvajanje Zakona o Uredu disciplinskog tužioca Bosne i Hercegovine sadržan je u odredbama člana IV 4 a) Ustava Bosne i Hercegovine, prema kojem je Parlamentarna skupština Bosne i Hercegovine nadležna za „*donošenje zakona koji su potrebni za provođenje odluka Predsjedništva ili za vršenje funkcija Skupštine po ovom Ustavu.*“.

### II - RAZLOZI ZA DONOŠENJE ZAKONA

Jasno je da važeća zakonska rješenja ne osiguravaju, na adekvatan i javnosti prihvatljiv način, odgovornost nosilaca pravosudnih funkcija u BiH. Prema odredbama Zakona o Visokom sudskom i tužilačkom vijeću Bosne i Hercegovine, članovi Vijeća, a u velikom broju slučajeva i nosioci pravosudnih funkcija, za svoje radnje poduzete u okviru službene dužnosti koju vrše odgovaraju "sami sebi", bez ikakvog efikasnog nadzora nad njihovim radom. Takvo stanje stvari dovelo je do odsustva bilo kakve odgovornosti i potpunog gubitka povjerenja u pravosuđe u uvjetima ekstremnog nivoa narušavanja vladavine prava, te prava i sloboda građana pa čak i do potpuno neprihvatljivog i nedoličnog ponašanja nosilaca pravosudnih funkcija. Brojni su slučajevi u praksi kojima se vrijeđaju principi na kojima se zasniva svaki civilizovani pravni poredak, a u nekim slučajevima i osnovi elementarne logike. Takvo stanje je notorno poznato u brojnim vrlo osjetljivim oblastima života.

Također su poznati primjeri pravosudnog progona po političkoj ili drugoj ličnoj osnovi, koji su završeni oslobađajućim presudama, ali su takvi progoni u višegodišnjem trajanju nanijeli nepopravljivu štetu na strani osoba u pitanju i njihovih porodica, ali i po princip vladavine prava. Sve to je posljedica nedostatka institucionalnih mehanizama za demokratski nadzor nad pravosudnom granom vlasti, i odsustva djelotvorne sankcije.

Ovim prijedlogom Zakona se uvodi efikasan mehanizam nadzora i mogućeg sankcionisanja nosilaca pravosudnih funkcija u slučajevima kada to nalaže vladavina prava i okolnosti zasnovane na utvrđenim činjenicama. Također, postupak predviđen ovim Zakonom koji se predlaže, način imenovanja i razrješenja disciplinskog tužioca te struktura organa/komisija koje provode postupak, garantuju transparentnost, objektivnosti i sprečavanje zloupotrebe predloženog mehanizma razrješavanja od dužnosti disciplinskog tužioca koji zloupotrebljava ili na drugi način krši pravila funkcije koju obavlja.

Ovakva mogućnost ostvarila bi društveni uvid i nadzor nad transparentnošću rada i odgovornosti u oblasti pravosuđa.

U cilju jačanja garancija nezavisnosti sudstva i samostalnosti tužilaštva, između ostalog i od svih oblika politizacije i pritisaka, Ured disciplinskog tužioca treba imati eksplicitan status. Zakon o VSTV-u je neophodno revidirati kako bi se osigurala nezavisnost disciplinskog tužioca.

Borbu protiv korupcije i organiziranog kriminala ometaju nedovoljno usklađeni propisi u zemlji i slaba institucionalna saradnja i koordinacija. Raširena je korupcija i svi nivoi vlasti pokazuju znakove da su pod kontrolom politike, što izravno utiče na svakodnevni život građana, posebno u oblastima zdravstva, obrazovanja, zapošljavanja i javnih nabavki. Okvir

strateške politike, te institucionalni i pravni okvir za sprečavanje korupcije su fragmentovani i imaju značajne nedostatke. Agencije za provođenje zakona su fragmentovane i podložne neprimjerenom političkom uplitanju. Tužioci nisu dovoljno proaktivni. Finansijske istrage i zapljena imovine su uglavnom neefikasni.

Jasno je da je potrebno izvršiti sveobuhvatnu reformu pravosuđa u skladu sa mjerama/preporukama Europske komisije, na način kako je to praksa u zemljama Europske unije. Svi djelatnici u pravosudnom sistemu moraju imati takav nivo ličnog integriteta koji bi garantovao njihovu pretpostavljenu nezavisnost. Prema svim djelatnicima u pravosudnom sistemu trebaju postojati utvrđene norme koje daju mogućnost korekcija, kada oni ne rade dobro svoj posao. Posebno treba obratiti pažnju da novo zakonsko rješenje prema mjerama iz Mišljenja Europske komisije, mora sadržavati kvalitetniju proceduru za disciplinske postupke protiv njih nosilaca pravosudnih funkcija.

### III - PRINCIPI NA KOJIMA JE PRIJEDLOG ZAKONA ZASNOVAN

Prijedlog zakona zasnovan je na principima:

**Princip vladavine prava** – usvajanjem ovog prijedloga Zakona osigurali bi se nedostajući demokratski mehanizmi kontrole, nadzora i sankcionisanja za propuste u obavljanju nadležnosti nosilaca pravosudnih funkcija što, u konačnom, vodi jačanju njihove odgovornosti, a što je nužna potpora i preduvjet ostvarivanja principa vladavine prava u demokratskom društvu;

**Princip pravne sigurnosti** – aktuelnim zakonskim rješenjima koja ne omogućavaju bilo kakav oblik ostvarivanja demokratskog nadzora nad radom nosilaca pravosudnih funkcija, odsustvom efikasnih mehanizama za utvrđivanje i sankcionisanje neodgovornosti i propusta nosilaca pravosudnih funkcija, potkopava se i princip pravne sigurnosti, kao jedan od najvažnijih principa u svakom demokratskom društvu, pa se ovaj prijedlog Zakona rukovodi potrebom da se ovom principu da neophodna potpora kroz mehanizme osiguranja odgovornosti nosilaca pravosudnih funkcija na efikasan način;

**Princip nezavisnosti pravosuđa** – princip nezavisnosti pravosuđa nesumnjivo je ugrožen u uslovima kada su nosioci pravosudnih funkcija oslobođeni bilo kakvog objektivnog nadzora prijeko potrebnog u demokratskom društvu pa se Zakon predlaže kako bi se osigurao princip nezavisnosti pravosuđa kroz mehanizme demokratske i efikasne kontrole, kao i kroz sam sastav Vijeća. Jasno je, a i prigovori struke nedvojbeno upućuju na to da o pokretanju postupka ocjene disciplinske odgovornosti nosilaca pravosudnih funkcija ne bi smjelo odlučivati tijelo koje je imenovano od strane potencijalnih učinilaca disciplinskih prekršaja.

Zato je Ured sastavljen od osoba koje imenuje i razrješava Predstavnički dom Parlamentarne skupštine BiH kako bi se ostvario društveni nadzor nad procesom odgovornosti nosilaca pravosudnih funkcija. Izbor nosilaca pravosudnih funkcija i dalje je u usključivoj nadležnosti Vijeća, te se zakonodavna vlast ni na koji način ne može miješati u te procedure, ali se daje nadležnost i mogućnost da predstavničko tijelo kao reprezent suvereniteta građana može da reaguje, provede postupak na transparentan način i, eventualno, sankcioniše neodgovornost u vršenju funkcije disciplinskog tužioca. Pri tome treba imati u vidu da, u skladu sa ovim prijedlogom, postupak utvrđivanja činjenica i provođenja javnog saslušanja, provode



Prvostepena i Drugostepena komisija sastavljena od zastupnika i profesora pravnih fakulteta, u kojoj mora biti zastupljen i predstavnik opozicionih političkih stranaka. Sam postupak, struktura komisije, javno saslušanje dovoljne su garancije da ovaj mehanizam ne može biti zloupotrijebljen u političke svrhe, te se time dodatno osigurava nezavisnost pravosuđa, ali i odgovornost Ureda disciplinskog tužioca, što do sada nije bio slučaj;

**Princip efikasnosti pravosuđa** - uvođenje efikasnih i transparentnih demokratskih mehanizama kontrole, nadzora i mogućnosti sankcionisanja, a time posredno i neodgovornih nosilaca pravosudnih funkcija nesumnjivo je, po svojoj naravi, u funkciji podizanja nivoa efikasnosti pravosuđa;

Iz naprijed navedenih, ali i drugih razloga se podnosi prijedlog ovoga Zakona.

#### **IV - USKLAĐIVANJE PROPISA SA EUROPSKIM ZAKONODAVSTVOM**

Donošenjem predloženog Zakona osigurat će se neophodan nivo usaglašenosti Ovog zakona sa standardima savremenog evropskog prava i pravnog naslijeđa poznatog pod nazivom *acquis EU*, kao i sa međunarodnim standardima i preporukama Vijeća Evrope u ovoj oblasti.

Ovaj Zakon je u značajnijoj mjeri od prethodnog usklađen sa osnovnim načelima i principima EU zakonodavstva, kao što su: transparentnost, jednak tretman prema svim nosiocima pravosudnih funkcija, nediskriminacija, kao i postupak pravne zaštite .

Tekstom Nacrta zakona izvršena je sistematizacija odredbi zakona u odnosu na data rješenja na način da se dograde, preciziraju i unaprijede postojeća pravna rješenja te da se u odredbe istog ugrade standardi savremenog evropskog prava i pravnog naslijeđa kao i međunarodni standardi i preporuke Vijeća Evrope u ovoj oblasti.

#### **V - PROVEDBENI MEHANIZMI I NAČIN OSIGURANJA POŠTIVANJA PROPISA**

Provedba ovog zakona osigurana je u okviru javnih organa, odnosno zakonodavnih, izvršnih, sudskih organa vlasti, javnih ustanova i već postojećih mehanizama i institucije VSTV koji će se transformirati u smislu odredbi ovog Zakona

#### **VI - OBRAZLOŽENJE PREDLOŽENIH PRAVNIH RJEŠENJA**

**Član 1.** propisuje predmet Zakona: osnivanje Ureda disciplinskog tužioca Bosne i Hercegovine, njegov rad, organizaciju, nadležnosti, ovlaštenja, uslove i mandat za vršenje funkcije, način izbora i imenovanje disciplinskih tužioca.

**Članom 2.** propisuje se samostalnost i pravni subjektivitet Ureda kao samostalnog organa.

**Član 3.** propisuje da funkciju Ureda disciplinskog tužioca Bosne i Hercegovine vrši glavni disciplinski tužioc i zamjenici glavnog disciplinskog tužioca, te disciplinski tužioc, a broj zamjenika glavnog disciplinskog tužioca i broj disciplinskih tužioca određuje Visoko tužilačko vijeće Bosne i Hercegovine. Narodi moraju biti ravnopravno zastupljeni, a u

obavljanju svojih dužnosti članovi Ureda disciplinskog tužioca Bosne i Hercegovine postupaju nezavisno i nepristrasno.

**Član 4.** propisuje da je rad Ureda disciplinskog tužioca Bosne i Hercegovine javan.

**Član 5.** propisuje da se Ured disciplinskog tužioca Bosne i Hercegovine se finansira iz Budžeta institucija Bosne i Hercegovine i međunarodnih obaveza Bosne i Hercegovine.

**Član 6.** propisuje da je sjedište Ureda disciplinskog tužitelja je u Sarajevu.

**Član 7.** propisuje upotrebu rodno osjetljivog jezika.

**Član 8.** propisuje da Ured disciplinskog tužioca Bosne i Hercegovine, vrši dužnost tužioca u vezi sa navodima koji se tiču povreda dužnosti sudije ili tužioca ili člana Visokog sudskog vijeća i Visokog tužilačkog vijeća, po pritužbama ili na vlastitu inicijativu. Za glavnog disciplinskog tužioca Ureda disciplinskog tužioca, Zastupnički dom Parlamentarne skupštine Bosne i Hercegovine, nakon provedenog javnog konkursa, imenuje osobu koja je sudija ili tužioc, ili koja ispunjava minimum uvjeta predviđenih Zakonom o Visokom sudskom vijeću ili Zakonom o Visokom tužilačkom vijeću. Mandat glavnog disciplinskog tužioca traje četiri godine, uz mogućnost ponovnog imenovanja. Glavni tužioc Ureda disciplinskog tužioca imenuje se i smjenjuje odlukom Zastupničkog doma Parlamentarne skupštine Bosne i Hercegovine. Nadalje, propisuje se i plaća, kao i nadležnost da donosi sve administrativne i finansijske odluke Ureda.

**Član 9.** propisuje obavezu Ureda disciplinskog tužioca Bosne i Hercegovine da blagovremeno obavijesti Predstavnički dom Parlamentarne skupštine BiH o isteku mandata pojedinog disciplinskog tužioca.

**Član 10.** predviđa da Ured disciplinskog tužioca vodi evidenciju o ulozenim pritužbama i o poduzetim radnjama u postupanju po pritužbama, istragama i disciplinskim predmetima, kao i da Visoko sudsko vijeće i Visoko tužilačko vijeće imaju pristup evidenciji.

**Član 11.** propisuje da stručne, finansijske i administrativne poslove Ureda disciplinskog tužioca Bosne i Hercegovine obavlja Sekretarijat Ureda, pod nadzorom glavnog disciplinskog tužioca, strukturu i nadležnosti Sekretarijata.

**Član 12.** propisuje način planiranja i izvršenja godišnjeg budžeta za rad Ureda disciplinskog tužioca Bosne i Hercegovine.

**Član 13.** propisuje obavezu da Ured disciplinskog tužioca Bosne i Hercegovine donese Poslovník kojim se uređuju pitanja propisana ovim zakonom i druga pitanja od značaja za organizovanje rada.

**Član 14.** propisuje obavezu Ured disciplinskog tužioca Bosne i Hercegovine da donese Pravilnik koji uređuje organizaciju, sistematizaciju radnih mjesta, poslovanje, imenovanje, disciplinske postupke i druga pitanja.

**Član 15.** propisuje da su svi sudovi, tužilaštva i državni organi, kao i sudije, tužioc, dodatne sudije, sudije porotnici i uposlenici sudova ili tužilaštava dužni postupati u skladu sa zahtjevima Ureda disciplinskog tužioca u pogledu davanja informacija, dokumenata ili drugog materijala u vezi sa ispitivanjem navoda koje vrši Ured disciplinskog tužioca Bosne i Hercegovine.

**Član 16.** propisuje obavezu sudovima, tužilaštvima i državnim organima, Visokom sudskom vijeću i Visokom tužilačkom vijeću, kao i sudijama, predsjednicima sudova, tužiocima, glavnim tužiocima i zamjenicima glavnog tužioca, sudijama porotnicima, dodatnim sudijama i uposlenicima sudova i tužilaštava, da postupe u skladu sa zahtjevima Ureda disciplinskog tužioca u pogledu davanja informacija, dokumenata i drugog materijala u vezi sa vršenjem nadležnosti Ureda disciplinskog tužioca, te da prisustvuju sjednicama u skladu sa zahtjevima Ureda disciplinskog tužioca u vezi sa vršenjem nadležnosti Ureda. Ured disciplinskog tužioca i njegovi predstavnici imaju pristup svim prostorijama i dokumentaciji sudova i tužilaštava u Bosni i Hercegovini.

**Članovi 17. do 21.** preciziraju sam disciplinski postupak te propisuju pokretanje disciplinskog postupka, podnošenje tužbe, prava stranaka tokom disciplinskog postupka, mogućnost postizanja sporazuma o zajedničkoj saglasnosti, zastarijevanje pokretanja disciplinskog postupka i zastarijevanje vođenja disciplinskog postupka.

**Član 22.** propisuje da su svi postupci ili radnje koje se odnose na navode o povredi dužnosti ili nesposobnosti za vršenje dužnosti, a koje su poduzete prije nego što Ured disciplinskog tužioca podnese zvaničnu tužbu, povjerljive prirode.

**Član 23.** propisuje da pritužbe ili dopisi koji zaprimi Ured disciplinskog tužioca u kojem se navode povrede dužnosti od strane sudija ili tužioca, kao i informacije prikupljene tokom istrage predstavljaju tajnu, izuzev za Visoko sudsko vijeće i Visoko tužilačko vijeće.

**Član 24.** propisuje nespojivost funkcija koje glavni disciplinski tužioc, zamjenik glavnog disciplinskog tužioca i disciplinski tužioc, kao ni osoblje Ureda disciplinskog tužioca ne smiju obavljati. To se posebno odnosi na funkciju i bilo kakvu dužnost u političkoj partiji, kao i u udruženjima ili fondacijama povezanim sa političkim partijama ili dužnost za koju se može smatrati da ometa ispravno i nepristrasno vršenje dužnosti glavnog disciplinskog tužioca, zamjenika glavnog disciplinskog tužioca i disciplinskog tužioca.

**Član 25.** zabranjuje glavnom disciplinskom tužiocu, zamjeniku glavnog disciplinskog tužioca i disciplinskom tužiocu da vrši bilo kakvu drugu javnu dužnost koja je nespojiva s vršenjem tužilačke dužnosti, osim ako zakonom nije drugačije propisano. Oni ne smiju biti advokati, notari niti obavljati druge poslove koji se obavljaju uz naplatu, a koji su nespojivi s vršenjem dužnosti tužioca.

**Član 26.** propisuje modus preuzimanja i raspoređivanja osoblja koje je zatečeno u Sekretarijatu VSTV-a, kao i mandate zatečenih disciplinskih tužioca, te imovine, finansijskih obaveze, opreme, materijalnih i nematerijalnih sredstava, spisa i drugih dokumenata ili vlasništva dosadašnjeg Ureda disciplinskog tužioca Visokog sudijskog i tužilačkog vijeća BiH.

**Član 27.** propisuje da se mandat direktora i zamjenika direktora smatra započetim danom preuzimanja dužnosti direktora odnosno zamjenika direktora.

**Član 28.** propisuje da se svi zakoni ili zakonske odredbe sadržane u zakonima koji su na snazi u Republici Srpskoj, Federaciji Bosne i Hercegovine i Brčko Distriktu Bosne i Hercegovine moraju uskladiti s ovim zakonom, a one odredbe koje nisu u skladu s ovim zakonom prestaju da važe.

**Član 29.** precizira način okončanja postupaka koji su započeti po važećem zakonu.

**Član 30.** određuje da je rok za donošenje podzakonskih akata najkasnije tri mjeseca od dana početka primjene ovog zakona.

**Član 31.** propisuje da ovaj zakon stupa na snagu osmog dana od dana objavljivanja u „Službenom glasniku BiH“, a vacatio legis je šest mjeseci.

#### **VI - POTREBNA FINACIJSKA SREDSTVA**

Za provođenje Prijedloga zakona nisu potrebna posebna finansijska sredstva.